

Al sarà il prin vôt cu lis gnovis regulis voludis de leç Gelmini: cui che al vinç al reste in cjarie par sîs agns e nol podarà jessi tornât a elezi. Si tache ai 8 di Mai.

Al tache il cont par ledrôs pe elezion dal gnûf retôr

Al scomence ae universitât di Udin il cont indaûr pes elezions dal gnûf retôr, che al menarà l'ateneu pai prossims sîs agns, dal an academic 2013/2014 fin al 2018/2019, e al jentrarà in cjarie il prossim 1 Otubar. Elezions sot dal segn des novitâts, viodût che a saran lis primis che a laran daûr des regulis puartadis de leç Gelmini dal 2010 e dal gnûf Statût di ateneu, fat bon intal 2012.

Il retôr cumò al podarà jessi elet tra i docents ordenaris in servizi intune des Universitâts talianis, statâls, no statâls o telematicis, al durarà in cjarie sîs agns academics e nol podarà tornâ a jessi elet (prime de riforme, inveizit, al jere elet tra i professôrs di prime fasce dal ateneu, al durave in cjarie trê agns e al jere di podê elei par un massim di trê mandâts seguitîfs, duncje nûf agns in dut). Pe prime volte, cun di plui, al è stât necessari candidâsi par jessi votabi. Chestis a saran ancje lis primis elezions dal retôr cul vôt electronic (introdut dal ateneu furlan plui o mancul doi agns indaûr). Ogni seç al varà a disposizion doi terminâi dulà che i eletôrs, dopo vè vût il certificât eletorâl, a metaran lis lôr credenziâls di vôt



e a podaran sielzi fra un dai candidâts o schede blancje (cul gnûf sistem i vôts nui no son).

Altre novitât e sarà la composizion dal eletorât afîf. Pe prime volte, di fat, cemût che al è fissât dal gnûf Statût di Ateneu, a podaran votâ no dome i rappresentants ma ducj i ricercjadôrs confermâts a timp indeterminât e ducj dependents technics e amministratîfs dal ateneu (il vôt di che-seç ultims, però, nol valarà un, ma 0,07, o sedi al sarà calcolât cu la

medie misurade dal 7% dal numar dai votants di cheste categorie), di là dai components dal Consei dai Students. A elei il gnûf Retôr, a saran duncje in complès plui o mancul 1.201 eletôrs, di chei 377 professôrs, 272 ricercjadôrs e assistents, 514 technics amministratîfs dal personâl e 38 students (no saran plui inveizit i rappresentants dai dottorants e dai specializants). Sis i seç preparâts: intes aulis 33 e 45 dai Riçs, inte sale Florie e inte sale

Colonis di palaç Flori, inte aule studi tal secont plan di vie Culu-gne 44 e inte aule F di vie Tomadini 30/A. Si podarà votâ des 9 aes 18.

“E je une elezion plui impegnative di chês altris voltis – al rimarche il professôr Livio Clemente Piccinini, dean dal ateneu – stant che cu la gnove leç il retôr al ven elet par sîs agns, un mandât tant lunc, intun moment che la universitât e scuén ancjemò sestâ la riforme Gelmini e, par vie la situazion di crisi economiche gjenerâl, probabilmèntri a saran decisions no tant populârs di cjapâ. Il compit che i spiete al gnûf retôr nol è facil. O vin di diûr graciis ai candidâts che a acetin di cori par cheste cjarie intun moment tant difici!”.

Lis elezions si fasaran intal mês di Mai: miercus ai 8, joibe ai 23 e joibe ai 30. Il gnûf retôr al varà di jessi elet inte prime votazion a maiorance assolute dai votants, intant che inte seconde e inte tierce a bastaran almancul il 40% dai vôts di podê esprimi. In câs di mancjade elezion intes primis trê votazions, si procederà ae balotazion, joibe ai 5 di Jun.

IN PISTE

Alberto Felice De Toni

Nassût intal 1955, al è professôr ordenari di Ingegnerie Economiche Gjestionâl. Al è stât, par altri, preside de Facoltât di Ingegnerie, president de Agenzie pal Disvilup Economic de Mont e vicepresident di Aree Science Park di Triest.



Paolo Pascolo

63 agns, al è professôr straordinario di bioingegneria industriâl. Al à insegnât in diversis universitâts, che tra chês, Pavia, il Politecnic di Milan e la Normâl di Pise. Al è diretôr dal dipartiment di Bioingegneria dal CISM e dal Cif (Centri interdipartimentâl di ricercje su culture e lenghe furlane).



Leonardo Sechi

51 agns, al è ordenari di Medicine interne e proretôr, dal 2001 al è diretôr de cliniche mediche e de Scuole di specializazion in Medicine interne, Gjeriatrie e Medicine di urgenje. Al è ancje diretôr dal dipartiment di Patologie e medicine sperimentâl e cliniche dal ateneu furlan.

